

山右石刻叢編

山右石刻叢編卷二十二

賜進士出身高平縣令郭兼都察院右副御史巡撫山西兼管提督按察使印務節制太原府城守尉吳門胡聘之疏

金

普恩寺重修碑

碑高七尺九寸八分廣二尺九寸五分三寸

二行行七十八字正書今在大同縣南寺

大金西京大普恩寺重修釋迦如來成道碑銘 并序

觀夫釋迦如來之垂化也淨法界身本無出沒大悲願力示現受生泊乎堯率天官為護明菩薩降迦毗羅國号一切義成金團天子選其家淨飯聖王為其父玉象乘日示來於大術胎中金輪作王降誕於無憂樹下現八十種隨形之妙好粲若分花示三十二大士之相儀皎如圓月十方而各行七步九水而共沐一身現優曇花作師子吼言胎分之已盡早

證常身為度生以還來重垂化跡於是遠羈襁褓示類嬰孩
為占相也悲暢於阿私陔仙往郊祠也驚起於大自在廟或
為童子或學嚴明為講武也箭塔箭井猶存為插力也象沒
象坑仍在受慾樂於十歲現遂觀於四門樂沙門身猷老病
死於是澡餅天子以儆覺彰伎女之醜容淨居天子以捧持
躍車匿而嚴駕踰春城於八夜棲雪嶺於六季□辭愴戀主
之心馬舐落連珠之淚揮寶刀而落紺髮塔起天宮將袞服
以質皮衣形叅麋鹿扣林仙之所得了世定之非真食麥食
麻降苦降樂且夫瑤琴奏曲必自中而曲成佛果圓因亦假
因而果滿由是擇其趣也過龍窟沐其身也入蓮河示其食
也受難隨之乳糜示其座也受吉祥之苑草以寂後之聖體
詣菩提之道場圓解脱之深因登金剛之法座一百四十之

功德不共二乘八萬四千之法門高超十地由是魔軍威懾於慈力愁怖旋歸媚女販毒於定心熒羸變質於是堅牢地神踴躍以作證虛空天子展轉而報知類蓮花而出水赫煥無方若桂月以懸空光明洞徹經七日受提衛之赴蜜驚以少小之言垂一音受賈客之戒歸賜與人天之福既成佛已觀所化緣悲二仙而不遇雷音喜五人而堪從佛化然以塵根味劣聖智淵深順其法則法不應根順其根則根無達法莫不為愛河之所溺緣癡樂之所盲苟不利於當聞仍假言而入滅於是切利帝釋雲驅於三十三天堪忍界王霧擁於一十八梵頭面作禮致敬精專請轉法輪勸隨宜說如來尋念善逝通規順古佛之佳謨應群機之鄙欲於是十方佛現同興讚美之詞一法乘分共劫塵勞之域由是起道樹詣鹿

園三月調根五人得度橋陳如悟慈尊之首唱初解標名舍利弗逢馬勝以傳言於途見諦採菽氏繼踵以師事率門屬以同歸迦葉氏暈跡以降心領火徒而廻席莫不以甘露洪注末泥普熏天界人界鸚林鹿林或鷲池或鷲嶺或海甸或菴園或彌猴江或火龍窟或注波羅柰或居摩竭提或依堅守林或止音樂樹或海濱楞伽頂或山際補陀巖或伽蘭陀竹林或舍衛國金地或應念而空現或沒山而出宮或說法假於六方或變口而為三尺或掌覆指變或光流佛來或一身普集於多身或此界便明於他界其間所說阿含四有般若八空密嚴華嚴佛藏地藏思益天之請問楞伽頂之悟心萬行首楞嚴一乘無量義大悲芬陁利法炬陀羅尼無垢稱之說經須達拏之瑞應本事本生之別諷誦重誦之殊象馬

兔之三獸渡河羊鹿牛之三車出宅或謂之有守邊中也或謂之無轉照持也或謂之頓也漸也或謂半也滿也無小而不大無邊而不中三乘同入一佛乘三性同歸一佛性真可謂父母孩孺道師嶮巖懸朗月於幽霄布慈航於幻海為雲為雨使枯槁以還滋為救為歸指窮途於壽域於是所作已辦功成不居將返本以還源類薪盡而火滅繇是指力地誦金河光流面門相驚塵刹山搖地動俱興苦痛之般異類變容同現奢華之血受純陀之後供納毗夜之真言唱四德以顯三伊指萬有而歸一性訓多羅迦葉四十二請問已周度須跋陀羅八十一化緣咸畢破十仙之橫計使獲朝聞建四塔之崇規退分末葉將欲明有為之有滅表無相以無生上昇金剛身往復虛空界日月猶其墜落螢光如何久留誠有

常身使無放逸於是還登玉座首卧鶴林遍遊三昧之門往
復一真之性逆入順入全超半超依四禪之等持湛三點之
圓寂是時也天人叫躡鳥獸哀號飄風驟雲山吼波逆按輪
王之古式方俟葬儀命力士以捧持竟無能動由是金棺自
舉遙拘尸之大城寶炬不然駐閣維之感禮莫不未生悉在
於王舍創結夢於十号慈尊大迦葉遠下雞峰將感禮於千
幅輪足必以兜羅織毼聖自火焚爇王衆旃檀之薪澍帝釋
深瓶之水彼願力猶在悲心尚熏碎金剛之勝身為舍利之
遺骨於是八國嚴衛四兵肅容各自捧於金壘竟爭興於寶
塔於是若牙若髮迦葉波禮於切利天宮或炭或灰無憂王
建於賤部洲界若乃金言道在塵劫法存象王去而象子隨
一燈滅而一燈續莫不大迦葉雲迎千衆阿難隨雷吼三輪

商那表定於未來趨多化籌而滿室始自壞梁之感終乎流
乳之積餅噐異而水必同燈點殊而光終一是以大乘之真
空妙有文殊彌勒異其宗小乘而分巵析金上座大眾元其
部或十枝橫闌或千部鬱興或馬鳴龍樹繼其芳或無著天
親播其美或提婆鑿眸而作噐或陳那吼石以飛聲或百偈
齊祛於外宗或十師翊贊於遺頌或聞經而夜昇兜率或侍
佛而窟寄修羅或劔誓首以邀期或象馳經而請譯或賞能
而食邑或得勝以建幢或論般若之理也名燈或究俱舍之
非也名電莫不殊途異轍終會一源自有及空皆成萬德自
商周見虹貫炎漢夢金人教及神州聲流華夏見聞盡爾宗
致照然蓋委遺文不復備而言也乃為銘曰

化起從本源 功成應賢劫 萬行顯真宗 三祇積鴻

業 爲法出於世 降靈示分脇 眉橫天地弓 目帶
青蓮葉 仙師相垂淚 地神驚捧接 灌頂當在宮
飛輪化彌帖 宋乘天日貴 象權師子頰 善教誰與
傳 拌彈獨豪俠 遊觀驚老死 踰城口臣妾 落髮
親寶刀 質衣遇羣獵 寄迹狎麋鹿 苦身示羸怯
食糜人盡知 坐草魔方懾 潔若蓮出水 明逾鏡開
匣 山海類高深 雲雷等詞捷 三時教彌闢 萬類
根自愜 四句聊欲訓 十仙度相躡 補處記慈氏
遺文囑迦葉 卧樹徒在春 香薪已焚口 悲心及綿
遠 舍利光暉睡 獨感生後時 餘波幸沾涉
太原王勃記

明昌元年十二月初八日三綱寺主沙門 法暉尚座清

明都維那道顯同建

雁門

奉政大夫試國子祭酒兼翰林直學士知制誥同修國史
党懷英篆額

銀青榮祿大夫柱國金源□開國公食邑二千戶食實封
貳伯戶□書

皇□起復開府儀同三司判西京留守大同尹兼本路兵
馬都總管食邑一萬戶食實封壹仟戶大功德主□□立
石

按碑刻唐王勃記末書明昌元年十二月初八日三綱寺
主法暉等同建今大同府志有此碑末題奉政大夫試國
子祭酒翰林直學士知制誥同修國史党懷英篆額銀青
榮祿大夫柱國金源關開國公食邑二千戶食實封二百

戶關書起復開府儀同三司判西京留守大同尹兼本路

兵馬都總管食邑一萬戶食實封一千戶大功德主關立

石金史党懷英傳字世傑馮翊人大定十年進士調莒州

軍事判官累除汝陰縣尹國史院編修官應奉翰林文字

翰林待制兼同修國史懷英能屬文工篆籀當時稱爲第

一學者宗之大定二十九年充遼史刊修官明昌元年再

遷國子祭酒二年遷侍講學士遷翰林學士金文雅趙秉

文文獻党公碑明昌元年遷直學士六年改翰林學士承

安二年改泰甯軍節度使明年召爲翰林學士承旨久之

致仕大安三年卒按史言明昌元年再遷祭酒而不言爲

翰林直學士党公碑不言爲國子祭酒而有爲直學士文

得此碑則史碑之闕皆可補又大同府志書人暨大功德

主下皆注闕名以金史考之書者卽完顏璘大功德主漢
王允蹈也金史永功傳子璘本名壽孫世宗賜名博學有
俊才善爲詩工眞草書大定二十七年加奉國上將軍明
昌初加銀青榮祿大夫衛紹王時加開府儀同三司貞祐
中封胙國公書此時正爲銀青榮祿大夫永蹈傳大定元
年封許王五年判大興尹七年進封越王十一年進封趙
王十三年拜樞密使二十一年改判大宗正事二十五年
六月加開府儀同三司二十六年復爲樞密使章宗卽位
起復判西京留守進封漢王明昌二年四月進封并王三
年判平陽府事此明昌元年十二月正永路判西京之證
與碑有起復文者合明昌五年賜死懷英璘中州集歸潛志並見
又金史百官志凡食邑封王者萬戶實封一千戶郡公二

千戶實封二百戶皆與此碑合碑見通志金石記

重修紀聖亭碑

碑高三尺一寸七分廣一尺六寸二分
十八行行三十六字正書今在浮山縣

平陽府浮山縣天聖觀重修紀聖碑亭記

唐革隋命起義太原撥亂返正與殷湯周武匹休比隆歷禩

三百而受命禎符告由

聖祖大上老君當高祖太宗之時凡五示

聖容

於平陽浮山縣境每遇征討預報捷期即建置廟像高宗乾

符元年策號

太上玄元皇帝逮明皇朝大闡祖風

升廟為觀勝日慶唐備極壯麗視亳州明道宮洛都北邙上

清宮等矣仍勅晉州節度為檢校慶唐觀使帝重念神降明

出偉事也日授訓辭瓌瑞也假晉民吉善行往來通報吉類

也貞觀中喬雲泊於廟宇垂拱中慶雲涌於神座重代鴻懿也蒲萄附栢起根裊蔓植物合異也根木枯枝更生連理華滋蕃熾也舉是六者作紀聖銘樹豐碑立言灑翰俱出宸造法奎圖之呈象煥雲漢之成章玉箸支離銀鉤粲爛又得它山之石寔鍾元氣之精秀稟生金潤全蘊玉繇開元十七年迄茲僅五百歲無纖瑕點翳叩之清音發越猶霜鍾雲璈誠難得之貨希世之珍也碑陰並列一時臣佐姓名勅左相燕公張說題御製御書字勅集賢學士翰林院應奉朝議郎贊論皇太子兼侍諸王文章呂向寫碑陰姓名年月故老相傳石自長安護載及此理或有之舊蓋碑亭經久嚙毀觀門知事道士閻師一等掄材選工不日興起其翬飛綺錯之狀與碑為稱焉來謁記文因具述之

大金明昌三年壬子歲夏季月望日

承務郎前太常博士兼校書郎雲騎尉賜緋魚袋致仕平

水毛麾謹記

門人鄉貢進士孔之固書丹

直歲李敏行 監齋秦善教 尚座朱通達 康知柔

副觀陳通壽 知觀閻師一立石

沖和大德道錄判官翟洞真 (玄)通大德道錄賜紫史(玄)

德勸緣 里人衛堅刊

按通志古蹟考天聖宮在浮山縣南三十五里羊角山之

麓唐武德二年建開元十四年賜慶唐觀額宋天聖五年

詔改爲天聖宮內有唐宋碑太平寰宇記晉州神山縣武

三年吉善行於羊角山見神人改神山縣老君祠在縣東南二十里唐武德三

年見神於羊角山下語曲沃縣人吉善行日報大唐天子
得聖理一千年其年敕遣通事舍人柳憲立祠因改縣爲
神山開元十四年於舊廟置慶唐觀按碑云乾符元年策
號太上元元皇帝舊唐書高宗紀下乾封元年二月己未
次亳州幸老君廟追號曰太上元元皇帝創造祠堂碑作
乾符誤乾符僖宗年號又碑云仍敕晉州節度爲檢校慶
唐觀使以新書方鎮表考之興元元年置晉慈節度使尋
罷太和元年升晉慈觀察使爲保義軍節度是年罷開元
不得有晉州節度碑謂晉州節度者據後言也五代梁始
定昌此碑所引唐開元御賜碑文今具唐慶唐觀紀聖頌
節度以晉州爲
張說呂向官亦見唐碑陰舊唐紀開元十五年二月有左
丞相張說新呂向傳開元十年入翰林侍太子諸王爲文

章皆與碑合記因碑亭久隳重新而作末題金明昌三年

壬子夏季月望日承務郎

從七品上

前太常博士兼校書郎雲

騎尉

正七品動

賜緋魚袋致仕毛應記鄉貢進士孔之固書應

見中州集又大定二十六年爲沁州同知見潞州寶峯寺

碑

今以此碑考之知以太常博士致仕

寶峯碑應結銜爲從仕郎

從八品下

雲騎

尉借緋魚袋此碑動與大定二十六年同而階服色並少

進孔之固襄陵人明昌進士貢舉譜列之校毛應所製碑

文今見者猶夥如潞州寶峯寺記潞安府志潞州重修學

記及此碑文皆樸茂雄俊固金世之工文者碑見寰宇訪

碑錄通志金石記

福巖寺牒

石高一尺三寸廣二尺六寸五分十
五行行字不等正書今在壺關縣

尚書禮部牒

潞州壺關縣東坊八龍王院僧清真狀告自來別無名額
已納訖合着錢數乞立寺名勘會是實湏合給賜者

牒奉

勅可特賜福巖寺牒至准

勅故牒

大定三年二月十日令史向昇押主事安押

中憲大夫行負外郎李押

郎中

鎮國上將軍行侍郎阿典

正奉大夫禮部尚書兼翰林學士承旨王

皆明昌四年八月望日寺主僧淨福立石

副寺僧淨寧

石匠梁俊刊

按碑刻潞州壺關縣東坊八龍王院僧清真狀告自來別無名額已納訖合著錢數乞立寺名牒可特賜福巖寺壺關縣志金慈雲院僧清真修造記有清真買八龍王院爲福巖寺文可與此相參證牒末題大定三年二月十日有中憲大夫行員外郎李郎中鎮國上將軍行侍郎阿典正奉大夫禮部尚書兼翰林學士承旨王按問喜諸縣大雲寺等牒員外郎郎中皆列階官及姓侍郎無之此牒則侍郎列階與姓而郎中無與諸牒不同碑立明昌四年八月碑見通志金石記

五龍廟祈晴記

碑高二尺一寸廣二尺五分十四行行十四字分書今在長治縣

明昌癸丑秋八月禾黍皆實大雨旬浹不能收穫民咨胥怨
晏默禱於

五龍神為民祈晴復遣官齋祝板詣廟致清酌之奠翌日雲
開日出晴霽月餘田功告成九月二十日率寮屬割牲釀酒
少荅神休迺命孫男育堂書之以識其歲月云

卽度使李晏同知唐括贊卽副完顏智卽判蒲察思忠察
判梁瑄上黨令夾谷中錄事李肅潞城主簿權教授孟震
上黨丞郭倬主簿宋文舉尉斜外溫玉司獄劉仲軻倉使
茹鐸庫使劉仲通庫副程嘉郡士張景房高平進士盧洵

秦德刊

按碑云以明昌癸丑八月大雨祈晴禱應而立癸丑明昌
四年碑末列銜有節度使李晏金史晏傳章宗立以年老

乞致仕改禮部尚書翰林學士承旨越二年復申前請授

沁南軍節度使久之致仕上念其先朝舊人復起爲昭義

節度使明昌六年歸老史不言何年除昭義以碑考之則

明昌四年晏已爲節度使又碑列同知唐括贊昭義同知節度使

節副完顏智昭義節度副使節判蒲察思忠金史有傳大定二十年進士累官翰林

學士卒不言爲昭義節度判官察判梁瑄今潞安志作梁鎰范陽人明昌間爲昭義觀察判官有惠民

記上黨令夾谷中志有官錄事李肅潞城主簿權教授孟

震上黨丞郭倬主簿宋文學尉斜卯溫玉李肅以下潞安

志皆未載宜据碑補又所列人名尚有司獄劉仲軻倉使

茹鐸庫使劉仲通庫副程嘉郡士張景房高平進士盧洵

中州集洵字仁甫高平人有詩學年六十一呂造榜登科

歷河南教授宜陽令致仕年八十三卒今揚本題進士則

河登科應在明昌癸丑前碑立明昌四年九月也又中州
集梁瑄字國寶范陽人大定十六年進士歷州縣由戶部
尚書參知政事未幾薨金史本紀大安三年四月有留題
長平驛詩此瑄仕潞澤之證梁瑄中州集作瑄金史十二
卷作鏗十三卷作瑄與中州集合仍以從玉爲是

慈相寺修造記

碑連額高六尺八寸二分廣二尺二寸二十七行行七十
字正書額題慈相寺澄公修造之記九字篆書今在平遙
縣

汾州平遙縣慈相寺修造記

將仕郎前武州寧遠縣丞安泰撰并書

徵事郎前丹州宜川縣令顏詒篆額

金倦民之道至廣至大無量無邊不可思議然自迹觀之以

整濟萬有誘化群迷使脫□塗而歸海上出愛河而登彼岸
後世奉之以為教者其法大率有三曰心曰日□□□
釋迦如來親授於大弟子者心法傳正法眼藏不由文字不
立言語以心印心直登覺地□傳於摩訶迦葉至蕭梁世有
圓覺達磨方求□□乃傳其法教法演三□十二分□由三
祇歷五位而漸致於等妙之地始自如來說法時有阿難集
而為經優婆離結而為律諸菩薩衍而為論至姚秦世鳩摩
羅什譯梵為華教始行於中國像法建塔廟設儀相幢花香
火嚴飾供養使人睹相生善始自如來欲涅槃時阿難親受
其說主東漢明帝夢見金人遣使天□圖畫其像因起寺於
洛陽像乃傳於中國三者之中像為易從故達人君子莫不
用之以化其俗後世因之日遠日甚是以範金墜丹雕木寶

□以奉其遺而無侈厭情者損力喪者施財悍夫嚙而色柔童子睹而意肅生則傾產奉施之死則舉族哀祈之心念□言罔非在佛噫人有歐之以法令脅之以鞭箠而逋懸欠負強梁桀鶩者終不能無及跪佛宮覩聖像而□心嚮道如是像法於人豈小補□汾州平遙縣慈相寺者乃古聖俱寺也寺在縣東太平鄉之異郭里始有大士繇西極來曰無名師宴坐於麓臺山四十載唐肅宗召詣京師待若悖□上元初示化於宮城之寺即詔還故山至前宋慶曆間寺僧道靖□塔藏之寺之興也以此皇祐□年改賜令額宋末兵火焚毀惟三門正殿存焉迨

本朝天會年間有僧寶量仲英相與起塔於舊址立法堂於殿後餘稍增葺未能完備量英尋歿有主僧澄公慨然嘆

日我先師輩營治田業戶甲三州其於贖衆之意勤且至矣
至於寺宇則未宏大何以能徭動群品而堅湊善之心乎遂
請前本州僧正和衆大德純贖於塔後建大堂曰普光取佛
堂說法於普光明殿之遺意也堂設毗盧遮那佛壁繪□□
佛八金剛四菩薩帝釋梵王堂之右翼置釋迦六祖繪二十
八祖以彰心印所傳之自也左翼置地藏菩薩十王像以示
善惡必報結人善心也堂之前其友福勅又起兩廡塑佛□
薩五十阿羅漢五百樓臺妓樂寶山琪樹珍禽異獸奇花瑤
草七寶嚴飾五彩彰施爛熳煌煌聳人瞻視功□□三二僧
繼化公皆畢焉公復於塔內層設聖像以為粧嚴塔前對立
□亭東置土地神像西覆聖井仍塑五龍王於井上法堂之
東廡立闕將軍像以玉泉山護法故也寺舊有鐵像菩薩二

□公補為萬殿左起大屋而置焉增塑慈氏文殊二菩薩洎
十大論師於其間其餘門廊廳堂厨廡樓閣洎僧徒藏獲備
保馬牛之舍或增舊創新或支傾補壞凡一千二百餘間□
中豫設之儀器用之具一□闕者開庭隙地則植以松竹花
木於是僧有經行晏坐之安人適遊禮虔仰之願然後作大
佛事三晝夜飯緇素萬人慶其成也猶以為未足復命大法
師起講筵三歲齋嘍無虛日鐘梵無庸聲見者起敬聞者發
嘆鄉近感化多為佛人矣功德既圓仍念前修舊跡恐遂湮
沒乃磨刻數碑以紀先師之行狀祖隱之舊山遠近法眷聖
藥□流炳然在石為不朽計起自 大定 乙未成於 明昌
庚戌十五年間辦此大事計其所費奚可勝言其協力者管
勾僧福景管庫僧福恩既而功成事遂公始計退休即於殿

廡之西庭屋十數楹別為聖賢像期以清寂自守香火禮念而終身焉公名福澄俗□胡氏本縣欽賢里人年十三普度為僧資量即其師也公為人嚴整慎重長於籌畫故自幼至今四十餘年經營寺事無不幹濟寺舊枕麓臺河河岸崩潰歲勞伺護乃役夫二千□水遠流遂免其患東南原有別業數百畝恒苦遠治乃構屋數十間就召耕傭遂為便易先是無名師有遺□□樂世嚮以資道用至公住持利入百倍租田數十頃僅備喉糧之給至公經畫收亦數倍其營建之費雖外藉檀信而田藥所助□□□焉人皆推為福慧僧也僕甫以母憂居鄉里□廬塊坐無意著述逼以其門人文□□濟勤請再四乃直筆其事殊愧漏略

明昌五年春四十有二日記

尚座僧福泉 副寺僧福玠 監寺僧福恩 知庫僧文
妙 庄管僧文意 副寺講唯識論僧文喜 門人僧文
普立石

將仕郎平遙縣丞兼管句□平倉事張公著

忠武校尉行平遙縣尉武騎尉納蘭泰安

宏遠大將軍行平遙縣令輕車都尉食邑七百戶兼管□

□平倉事徒單義

忠武校尉行平遙縣主簿武騎尉兼管句常平倉事虞希
說

本縣史輯并男宗詮刊

按碑題將仕郎前武州甯遠縣丞安泰撰并書從事郎前
丹州宜川縣令顧諮篆額碑云法堂東廡立關將軍像以

玉泉山護法故也。按慈相寺關將軍廟另有碑，郝瑛撰記。其前半引宋張天覺玉泉山關公碑文，亦以護法命意。蓋以廟立佛堂之東，故不得不爾。又碑云：起自大定乙未，成於明昌庚戌十五年。間辦此大事，計其所費，奚可勝言。大下所闕字，據年表知爲定蓋、明昌、庚戌、上溯大定乙未，恰得十五年。故知卽是乙未大定十五年，又碑云：公名福澄。

俗姓胡氏，本縣欽賢里人。按郝瑛關將軍廟記亦稱公名福澄，但未及其姓里耳。泰和元年四月，趙大端慈相寺僧塔記稱澄公住持之力，並言當時鄉官安大夫碑記存焉。按卽此碑。文獻通考汾州平遙縣有麓臺山，有嬰澗水。此碑之麓臺河，當卽嬰澗水。是又太平寰宇記謁戾山在縣東南四十七里，一名麓臺山，山海經謁戾之山，嬰侯之水。

出焉北流注於汜水合證數書嬰侯嬰澗均卽一水其源
實出麓臺非碑之麓臺河而何志以酈道元水經注謁反
山嬰侯水似尚有不然者蓋未合數書攷訂耳碑末題銜
有將仕郎平遙縣丞兼管句常平倉事張公著忠武校尉
行平遙縣尉武騎尉納蘭泰安昭遠大將軍行平遙縣令
輕車都尉食邑七百戶兼管句常平倉事徒單義忠武校
尉行平遙縣主簿武騎尉兼管句常平倉事虞義說張公
著以下可補志闕

旌忠廟牒

石高一尺四寸五分廣六尺八寸五分四十八
行行七字至九字不等行書今在鳳臺縣城

尚書省牒澤州旌忠廟

禮部狀承勅吏部尚書王孝述劄子奏臣聞天下之大開

忠義是也。忠則秉心常不欺義則臨難無苟免人主所以維持國家賴此而已。比者盜發東南震驚剝子武林重鎮望風奔潰無復古人仗節捐軀之氣。臣以謂褒崇忠義以勸方來正當今之急務也。謹按五代史裴約以裨將為莊宗守澤州方李繼韜據上黨叛約嬰城固守誓不從賊力屈勢窮卒被屠戮歐陽脩嘗謂吾於五代得全節之士三人約其一也。後唐迄今二百年幸逢明聖咸秩無文之世而名未編於祀典澤之士民相與築室而祠之規櫺庫陋議者興歎。臣愚欲望聖慈特降

府旨委白漕臺量支繫省錢增廣祠宇明詔太常揭美名以寵之仍舉侯爵加焉載之祀典俾歲時省祭有司奉牢醴以從事豈獨慰英靈於九泉庶幾厲風節於百辟天下幸

甚取 進止

牒奉

勅朕惟率世厲俗之制為政所先仗節死義之臣於時罕見
昔有其士今而進封庶幾恩榮鼓舞幽顯惟爾生於五季仕
專一心崛起擢擢之間奮以精忠之節視彥章而克壯配仁
贍而用光有司遺文久稽典祀錫之侯爵賁以嘉名豈惟慰
一郡之心實以垂千古之訓尚其不昧彰此殊休宜特封忠
烈侯牒至准

勅故牒

宣和四年五月 日牒

太中大夫守右丞李

押

太中大夫守左丞王

押

少傅太宰

押

宣和間進士浩天澤得前件黃牒以主其祠天澤傳其子進義温温傳其甥張溥盖大定初也至二十八年溥傳其道士郭景昭應衆人之請也景昭病其已久湮滅後人不知始封之由求余書斯文于石或曰書勅牒筆吏之事也應之曰使裴君尚在雖執鞭亦願為之矧能少發其輝光奈何辭焉

禮部近奉

條理典故許引用宋事夫褒崇忠義

本朝之急務也士大夫以偽命換官者不可勝計豈知它日不因此史侯之增封者耶明昌五年秋七月十有二日朝列大夫澤州刺史許安仁書

冲素大德前管内威儀道士郭景昭立石 宋德樂元刊

按通志金石記鳳臺縣志旌忠廟牒宋宣和四年勅賜金
明昌五年許安仁摹勒於石牒云禮部狀承勅吏部尚書
王孝迪劄子奏云云請進止牒奉勅特封忠烈侯牒至准
敕故牒宣和四年五月牒太中大夫守右丞李太中大夫
守左丞王少傅太宰考牒中右丞李者李邦彥左丞王者
王安中少傅太宰而不書姓者王黼也按宋史宰輔表宣
和三年十一月丁丑李邦彥自翰林學士承旨太中大夫
知制誥兼侍讀修國史除尚書右丞王安中自太中大夫
尚書右丞遷左丞又是年九月丙寅王黼自少保太宰加
少傅黼四年六月丙午加少師五年正月辛酉安中知燕
山二月乙酉邦彥遷左丞四年五月皆未遷與碑合
皆與碑合鳳臺縣志王孝迪字舜民瑯邪人以進士知軍

州事有惠政入爲吏部尚書百姓遮道攀留羣言後唐節臣裴約公死事茲土未蒙崇祀昭忠祈請於朝孝迪爲劄奏允行牒敕建祠褒封忠烈侯孝迪見長編拾補胡舜陟奏爲吏禮部尚書翰林學士宋史宰輔表靖康元年正月

庚午自翰林承旨爲中書侍郎二月以資政殿學士提舉

禮泉觀

鳳臺縣志宋史孝迪與張邦昌六人同黨爲陳東所劾不堪列入政績但其官此土事有可傳姑載

之按云盜發東南者指謂方臘之亂兩浙諸州守臣趙霆等望風奔潰也裴約見五代史記死節傳裴約者潞州之牙將也莊宗以李嗣昭爲昭義軍節度使約以裨將守潞州嗣昭卒其子繼韜以澤潞叛降於梁約召其州人泣而諭曰吾事故使二十餘年見其分財享土欲報梁仇不幸早世今郎君父喪未葬違背君親吾能死於此不能從以

歸梁也莊宗聞顧符彥審曰吾不惜澤州與梁一州易得約難得也爾識機便爲我取約來存審以五千騎馳至州而梁兵已破澤州約見殺校約歐史傳其事足動人忠義之氣宜乎澤民之不忘而宋詔之褒祀也浩天澤鳳臺縣志宣和進士許安仁金史有傳由左補闕爲澤州刺史在郡二年徙知河南今碑題明昌五年七月則是歲安仁猶刺澤也碑見寰宇訪碑錄通志金石記

祭裴忠烈公文

石高一尺六寸三分廣三尺二寸三十

九行行十六字行書今在鳳臺縣城

維宣和六年歲次甲辰十月甲辰朔二十一日甲子朝散大夫知澤州軍州管句神霄玉清萬壽宮賜紫金魚袋陳仲孫謹以清酌庶羞之奠敢昭告于忠烈侯惟公忠義許國仁愛

庇民當五代離蕩之際四方擾攘之日偷生苟免見利忘義
湍湍皆是如公之節義者幾何人哉公當是時撫有此土干
戈攻戰險阻艱難乃能以義自處奮不顧身風聲氣燭與烈
日秋霜爭嚴視生如鴻毛重義如泰山名垂史冊炳若丹青
逮我皇宋藝祖文宗混一區宇天下太平之日久矣此邦之
人思公之功德謂公之生也保衛吾民其精爽在於冥冥之
中豈易其志士民父老相與共語靡不感泣思欲褒顯成績
得以血祀不泯而永庇生靈時具以事聞於前太守王公孝
迪因民所請立言之朝廷仰干天聽俯畀俞音賜之侯爵旌
以忠烈給錢公府建立祠宇顯揚前勲庸勸來者後之視事
因循歲月凡歷二年迄未有成仲孫被命于朝方且待次夢
寐之間若與神接見誘以事初未之省及至下車披按公跡

仰觀勅旨乃知神異有如此者遂鳩工擇材塑繪廟貌工精其巧民獻其力不日而成經始於季春而告成于首冬謹以二十有一日諏辰之吉以禮奉神而安之嗚呼國家之於公也若是其厚人民之思公也如是之深黃河之流與公之功共注太行之山與公之名不朽公之英靈卽槩復如何哉蓋將佐佑國家保安人民與天地無窮日月同輝茲足以蒼揚休命公之風義如存庶幾明聽此言尚饗

國家昏亂識忠良歎息 君侯事晚唐誓報舊恩死守澤

肯從逆子叛降梁冰霜氣逼劉仁贍鴻雁行隨王彥章

或作

援兵未至賊先破 遺老相傳本可傷 五代三人全死節一篇華袞賴歐陽

郭師求書陳君祭文于石因取近所作過 旌忠廟詩併

書于後以遺邦人歲時歌以祀 侯庶幾見

烈大夫之彷彿也

明昌五年九月卅日河間許安仁題

郭景昭立石

宋德刊

按通志金石記石刻在旌忠廟宋知軍州陳仲孫撰文剴切激壯後有許安仁詩云云郭師求書陳君祭文於石因取近所作過旌忠廟詩並書以遺邦人歲時歌以祀內稱郭師則道士郭景昭也

以上節錄通志金石記

縣志陳仲孫傳字誼

成潁川人宣和中以進士官句神霄萬壽宮知澤州與碑題合通鑑長編拾補宣和元年六月甲戌御筆天下神霄宮知州軍帶管句事傳言前守王孝迪允爲裴侯建祠因循二載仲孫初被命夢與神接漫不之省下車後披按公

續見敕牒恍然悟卽爲創修祠宇繪侯像而詩以祀之其
文悲壯淋漓士民聞者皆爲之感泣玩傳文蓋亦據碑爲
之末所題七字詩以歐史考之逆子者指謂李繼韜云冰
霜氣逼劉仁贍者以仁贍傳在約後且非兵死也鴻雁行
隨王彥章者以裴約附彥章傳也安仁亦金世能文之士
而此詩不加雕琢頗類野謳毋亦欲使愚庶其曉而有意
爲之歟安仁刺澤見金史及碧落碑史以明昌四年出刺
澤碑立明昌五年九月與史合碑見通志金石記

唐興寺經幢

幢高二尺九寸六分每面廣四寸二分九
行行五十四字正書今在聞喜縣東鎮

佛頂尊勝陀羅尼經序

序不錄

佛頂尊勝陀羅尼經

經不錄

山志卷之二十二
三
口建此幢者先師之遺命也師諱普澗俗姓李氏皇統二禩
落髮入道每以營葺持誦為己任逮於維心之後一日因疾
召諸徒謂曰吾死之後當製佛頂尊勝陀羅尼幢立吾墳左
爾曹各守其道斯吾願矣於明昌甲寅歲閏十月二十日享
年七十有五也

大金明昌六年歲次乙卯三月日門人講口識論僧善慶
講華嚴僧智嚴 智深 智忠建 住持悟真 禪院

沙門智道 石匠



按聞喜縣志金尊勝陀羅經幢明昌六年在東鎮寺校唐
興寺在東鎮卽此石幢見通志金石記

福嚴院許安仁詩碑

碑高一尺四寸廣二尺八寸九行行
六字字徑二寸草書今在鳳臺縣

福巖院許安仁詩

峽石嶮崑一道幽神功開鑿幾經秋青蓮殿閣千山擁丹水
波濤萬古流林壑深埋龍虎氣雲煙誤入鳳麟洲今宵擲筆
臺邊月來照幽人物外遊

明昌六年四月九日宿青蓮福巖院為前都綱寶寂作此
詩澤州刺史許安仁書

按此詩刻於明昌六年四月九日金石記載明昌乙卯年
四月九日一詩明昌五年八月二日一詩獨無此詩

興學賦石刻

石高二尺廣四尺四寸二分大小字四十
八行行二十三字行書今在潞安府學

興學賦并引

東山逸翁申良佐謹呈

河東為天下雄勝之地而上黨乃河東名郡故號為天下脊
其人物勁家自古忠臣莪士多出為郡之長衢之東南文明
之邨有學校存焉自隋而上遠而不可知見之碑刻者李唐
以來於此已有之矣厥後世變多故其學校亦隨而興廢迨
乎國朝撫定之後專以文學取士而郡之士子紆青拖紫
比比有之學之興也從可知矣至正隆間學者多困於征
役不暇修習其學舍漸至摧毀幾不能蔽風雨良可惜哉欽
惟主上中興以來敦復文教俾郡國俱修學校獨斯郡之
學累經前政寢而不議自通守權鎮喬侯下車之始首議
與修自大定丁酉五月丁巳經始至是年十月乙亥告成越
翼日丙子集僚屬郡儒於議道堂大合樂以落之方此工之
將畢也適有旨立學官養天下之士固其興衰自有時乎

何如此之偶然也僕固嘉 喬侯興學之勤意又且樂馭
明時之為幸故敢作興學之賦以獻焉其詞曰

吾聞之三代之道兮立庠序建首善於京師至於鄉里有教
兮將令俗易而風移使四方皆從其化兮足以立太平之基
故然明請毀鄉校子產對所以議政之善否若之何而毀之
如其廢而不修鄭人刺子衿之詩雖文化由上之人倡率
亦由守令奉承呂周施故文翁起學於成都之市經明行修
者皆足以任使自後郡置其學官由蜀郡而為之始范甯亦
立學餘杭使諸生敦行而潔己致風行而化流自晉之中興
以來未有如此嗟吾邦學舍之荒涼土木盡為之摧毀豈止
學者之不可居藹藹牧豎者皆得而至止諸生有待其興修
蓋亦累年於茲矣嗟我 喬侯之來何莫兮今方幸得一新

而崇起將曰尊師講道藝明經取青紫由是鄉里之間郁郁乎有文歡頌之聲洋洋乎盈耳文翁固無少讓范曄無足為比蓋誠加勤意而然豈虛尚清談而已仁看不欠而升之廟堂之上誠能教育天下英才之美蓋君子之所樂固無以加於是諸生或有謂僕曰方此工之將畢也適有 旨養天下之士何其不謀而同歸異處而同出僕應之曰斯固興廢之有數亦乃君臣之德一僕方悼道之鬱滯而文明之化不圖復見於今日固將與諸生樂升平之永履閱學廢於疇昔儻非斯學之復興則吾徒將安之而講習噫 喬侯之心仁人之心也狂斐之言形容之不見故復系之以短什且與諸生歌之詠之所以推揚其茂實也

儒館興崇始自今茲歌喜復嗣徽音文風將見如齊魯免使

詩人賦子衿

承安戊午十二月中□日男□仕郎守信州軍事判官行

謹書丹

□□□□天德年間昇 時卿全赴 上京簾試始相識於
途中是時□□光已有□□□□□□自當場□又□不復相
見者迄今三十□□守官上黨□重修郡學□□古□以□
示其辭□□□□□□□□□□淵源固有所從來矣大定
丁酉□□十一月廿二日□□真

子宰上黨時已聞 時卿得聲場屋間當時士大夫競為稱
獎如昭義軍□□副使□吳□□□之聞久也愛其才行而
子妻之□□謂專事科□□□□□□□□□□學也□□□
□興學賦□□政喬侯君章稱賞嘉嘆由是鄉間競為□□

因得竊觀□□□□乃知□所□述亦皆□□人不獨科舉
之業為衆□□也大定庚子□七□通議大夫前同知虢州
軍州事致仕王□□□□題

按碑題東山逸翁申良佐謹呈碑云上黨乃河東名郡按
金史地理志河東南路有潞州昭義軍節度故云碑又云
郡學見之碑刻者李唐已來於此已有國朝撫定之後專
以文學取士郡士子紆青拖紫者比比有之正隆間困於
征役不暇修習謂金海陵用兵事其云主上中興以來敦
復文教俾郡國俱修學校按金史府學大定十六年置後
增州學凡試補學生州府以提舉學校官主之此郡國設
學之證碑言通守權鎮喬侯下車之始首議興修自大定
丁酉五月丁巳經始十月乙亥告成不言喬公之名以坐

中銘趙思誠跋言潞之通守喬公仲章作是銘考之與碑
所言通守喬侯合卽喬辰鳳臺縣志喬辰初名逢辰字仲
章又曰君章大定戊戌自山陽還天黨題名青蓮寺戊戌
大定十八年此是年辰猶任潞之證故碑後跋云喬侯君
章諸志以爲襄垣令誤辰大定十四年爲大理司直見太清觀碑大定丁酉跋
云關守官上黨重修郡學是喬君章跋時卿卽良佐字今
塌本漫漶據金石記補碑後刻天德間云云多磨泐不可
辨碑見通志金石記

文悟大師功德幢

幢共三列第一列高二尺廣一尺四寸三行行四字第二
列高一尺八寸廣二尺共六面每面二十三行側厚二寸
兩行均係咒語正書三列尺寸與二列同
二十行行字不等行書今在洪洞縣城北

奉爲文悟大師建立尊勝咒幢

咒語不錄

奉爲文悟大師建立功德幢記

□三身德本始自誘進童蒙四智道基□□□詢□□□垂
慈訓資稟□□師資道成聖賢行□恩超天地德之日月欲
報深恩□□□惠璠等特連城□□奉爲答報先大師文
悟僧錄和尚深恩仰憑聖力之命□□□磨翠鏡建立法□
穿鑿雲根柱嚴佛像□□滿教自他利濟無窮二聖全身說
聽證明有□萬行□□嚴不立僧祇獲法身□勝陞羅呢蠢
動含□皆作佛塵沾影覆盡澄□□諷□受持□圓種智山
海圍遶功德莫測其高深獅蠻護持邪魔不能得沮壞壯士
賀□扶接衆生有力菩薩威儀導引同行無虧頻伽奏樂吐
□圓音□仙雨花舉□浮卉蓮敷出水之相貌踞無畏之形
龍騰爲雨爲霖鳳舞程祥程瑞□輪運轉□□鈴聲警籌惜

沉重簷寶蓋□□□餘厚址金澗堅□□退□□□□□解
脫門來者瞻依請高着眼皆大金承安五年□□□□□□
中秋□□僧惠璉記

助緣建幢師德共列于後

襄陵化度院銖公戒師 北梁靈光寺□□傳妙大德□
公

楊曲福巖院遠公□師 本縣興化寺觀音□□壇宣
教大德復公

□州□□□戒師 □生院□王公戒師 佛殿□
□公法師

程曲村大雲禪院□□師 □村昭□院□公法師

□曲院金公法師

本府妙□寺□□院尼文義

東街孫善信 郝□ 李□卽 席大□ □□媵

賈村助□□□□ 李進畚 孟□□ 鄧文仙 李成

福 □□第 □□□ 郭進泰 孟著□ □文明

孟茂昌 劉□李 □□道 □□□ 孔□□ 刘茂

全 宋得與 張明玉 □進寶 □天奉 宋□□

王加勝 孟成印 張□友 李□云 □□□ 郭成

□ 李抱玉 另有題名一石多漫漶不可辨又
有康熙年重修古塔記五行不錄

按通志金石記金文悟大師功德幢呂琢書僧惠璉記卽
此石所書北梁楊曲程曲賈村諸名可爲考金洪洞地域
之助洪洞縣志楊曲鎮縣南二十里通志洪洞縣圖有程
曲太平寰宇記晉州洪洞縣故楊城春秋時楊國漢楊縣

城在縣東南十八里水經注魏土地記曰平陽郡治楊縣
郡西有汾水南流今洪洞楊曲之楊當以此得名也碑見
通志金石記

青蓮寺詩碣

石高一尺七寸七分廣五寸八分四行行
十一字至十三字不等行書今在鳳臺縣

承安五年閏月廿六日同張君玉吳壽夫來遊遂與寂公無
二登鳳皇山周覽青蓮之勝鈞幕河間許古道真題

按碑刻承安五年閏月二十六日同張君玉吳壽夫來遊
遂與寂公無二登鳳皇山周覽青蓮之勝鈞幕河間許古
道真題金史許古傳字道真汾陽節度使致仕安仁子登
明昌五年詞賦進士第貞祐初自左拾遺拜監察御史不
言承安中爲何官以碑題鈞幕考之當爲鈞州幕職官判

以下皆爲幕職金史本紀承安五年閏月乙卯朔則二十六日者

甲辰也中州集歸潛志均有古傳亦不言承安五年歷官

按金史許安仁傳河間樂壽人故此碑題河間又中州集古承安進士與史不合

碑見寰宇訪碑錄通志金石記

慈相寺僧塔記

碑連額高四尺八寸三分廣一尺九寸四分二十八行行六十三字分書額題僧眾塔記四字篆書今在平遙縣冀

村郭

平遙縣冀郭村慈相寺僧眾塔記銘

承務郎前汾州觀察判官雲騎尉賜緋魚袋趙大端撰

徵事郎行平遙縣主簿兼管句常平倉事嚴坦書

從仕郎前韓州軍事判官張天羽篆額

嘗謂係教之興久矣昔漢明帝以金人丈六之像形於帝夢

自茲教法西來流布中國故天下在在處處始建精寺□□
緇流而為崇奉吾佛之所爾後高僧名德相繼傳道闡揚教
風者代不乏人然皆於滅度之後往往為善知識修建崇塔
以瘞靈骨崇事不絕使後人尊之禮之望而起為善之心焉
此梵語所謂死建宰堵波者是已且汾州之平遙縣距城二
十里之遠有冀郭村慈相寺者自有唐肅宗以來其設寺額
本名聖俱而是時主持教法者即

始祖無名大師也至皇祐間改賜慈相之額其間傳法之流
雖繼踵而出然歲月深遠無復編錄止以近代祖僧□知其
賢者三人為始其壹曰惠載次曰惠灝又其次曰惠祚二代
相繼者十有一人而才德超軼傑然出於法眷之中者寶量
而已師俗姓冀氏侯冀村人也自二十一歲捨俗出家嘗以

法華大經試中甲選尔後雲遊諸方於大講席下諦聽經論
深悟佛旨數年杖錫還鄉其本寺僧衆請師出世開演教法
為衆宗仰名聲藉藉著於河東是時適遭亡宋之末兵連火
熾寺宇焚毀為之一空於是復請師為修造主師則欣然諾
之不憚艱苦勵心勸緣鳩工聚土不日寺亭完然一新十倍
於前矣而又創建

先師無名大師靈塔九級高十丈餘其為功力殆非淺淺者
所能之外法眷一十人曰善仁善測仲英仲則仲詵仲行仲
義仲證仲德獨仲來有紫衣之賜其間八人轉度門弟子七
人曰福江福玠福聚福靄福祐福教福恩僧寶量又度弟子
十五人以經論試中者四人普度者十有一人爾時復於侯
翼妙法寺住持以師之受業之所也未幾無病而遊葬於寺

塋為崇塔門弟子化者四人曰福應福全福珍福寧並於師
塋各為歸葬行脚一人曰福愈未還外已化者九人福詮福
淵福顯福現福肇福厚福勅福澄福感悉殯於慈相祖塋其
間福詮創蓋獻殿福寧起合論華嚴經板福肇構塔亭一座
內塑像十六尊羅漢聖像福勅建羅漢二洞各三十間福澄
增創堂閣寮舍仍命畫工作萬菩薩尊像而又粧飾羅漢聖
洞栽花植竹以為前後之莊嚴首尾二十年間增新完葺至
斯大備皆澄公住持之力也當時鄉官安大夫碑記存焉今
見住持僧福杲暨僧正大師文善共發虔誠將祖先師兄未
行歸葬者擇定今年四月初六日卜穴於寺之本塋其惠載
等三人各為起塔善仁等十人福詮等十有七人文妙文意
二人各建塔一所寺之西北一里許有塋地二十餘畝塋北

則有清水河之相接東偏則有祁城之相望其東南則地
巨於麓臺山西南則遠揖於平遙縣山水抱映埤勢坦然真
吉地也宜乎建塔之後教門滋大法眷叢出相繼不絕而永
福此方矣僕自承乏州幕今茲秩滿方以客寓於此忽一日
邂逅僧正喜公因喻及卜葬之事且丐文於僕以叙本末僕
誠不才安敢固辞因撫其實而為之銘曰

猗歟像教尊 非虛亦非妄 功德不思議 人天共尊
仰 惟茲冀郭村 古寺云慈相 祖僧惠載輩 三者

皆師行 叢林繼踵出 稱賢先寶量 才望著河東

高出時流上 雲遊亦既歸 講席推宗匠 適經宋之

末 兵火驚紛攘 佛宮偶遭焚 一掃如波盪 惟師

主營造 堂殿復增創 丹腰絢暈飛 爛金輝聖像

繼葬無名師 起塔踰十丈 云何無所苦 端坐俄長
往 卜穴妙法塋 歲時崇供養 逝者三數人 瘞骨
同原壤 其餘久未遷 散亂埋蓁莽 杲公僧正師
發願俱弘廣 為建宰堵波 各就先塋葬 地勢枕高
堦 面面平於掌 河連清水遠 城與祁 闕 向 麓臺
如對揖 平遙遠相望 山水映抱圍 蔚然含氣象
法神默護持 教門當益旺 願言福此方 永永無災
障

秦和元年四月六日

監寺沙門文普 副寺講唯識論沙門文覺 知庫講圓
覺經沙門文慶 都修造住持沙門福杲立石 廣濟大
德充汾州管内都僧正講唯識論賜紫沙門文喜同立石

奉政大夫行平遙縣令兼管句常平倉事張奎

宣武將軍行平遙縣丞兼管句常平倉事田伯充

武節將軍行平遙縣尉烏烈肅忠

陰陽人梁棟

汾陽李元甫摸刊

校碑題前汾州觀察判官趙大端撰行平遙縣主簿

兼管句常

平倉

事嚴坦書前韓州軍事判官張天羽篆額平遙縣志金

趙大端汾州觀察判官白號南莊逸民冀郭郝慈相寺有

所撰眾僧塔記

校卽此碑

又有留題碧鮮堂詩金史地理志汾

州置汾陽軍節度使宋用唐制節度例兼觀察泰和元年

六月許安仁畢宿廟碑題銜爲汾州節度觀察使可證故

大端得爲汾州觀察判官碑云寶量師俗姓冀氏侯冀村

人介休志有侯冀堡卽其地碑云亡宋之末兵連火熾寺

宇焚毀爲之一空此指北宋末粘罕之兵事碑以應住持僧福杲等之請而立按縣志載大端碧鮮堂詩跋杲公種

竹成叢因榜堂曰碧鮮當卽其人碑有僕自承乏州幕今

茲秩滿方以客寓於此卽爲縣志所本其所云瑩北之清

水河東偏之邴邱城東南之麓臺山太平寰宇記謁戾山

在縣東南四十七里一名麓臺山與碑東南合碑末所題

諸官有奉政大夫行平遙縣令

兼管句常平倉事

張奎宣武將軍

行平遙縣丞

兼管句常平倉事

田伯充武節將軍行平遙尉烏烈

肅忠皆見縣志按縣志卽本此碑但不題年代以碑考之

知爲泰和元年任此金史本紀明昌三年十月敕置常平

倉處縣兼管句其事碑立泰和元年四月六日故得以管

句常平入銜碑見通志金石記

畢宿廟碑

碑連額高四尺二寸廣一尺八寸十二行行二十四字行書末題二行行字不等正書額題汾州西河縣畢宿廟記九字篆書今在汾州府西北三里

汾州西河縣畢宿廟記

河東形勝之地風勁氣寒比太行之東不知高幾千尺也故自古無水患魏地隘狹土挾山坳歲時所不足者雨耳凡山澤可興雲雨境內諸神之祠遇有水旱求無不至汾州圖經載城北一里有畢宿廟自景德以前有之畢八星為天綱趙地冀州之域分野所在陰雨之星故謂之陰星畢西方金宿雨東方木氣金克木為妃故從妃之所好庶民惟星亦好其所好是氣類相求者也風雨師春秋已有常祀畢宿廟貌俎豆尸而祝之亦無不可有其舉之莫敢廢也晉制箕畢是二

十八宿之名風雨師是星之下隸兩祭無嫌樹老廟古年世已深邦人香火之奉能相與續而增新之廟與天星之久歲獲時雨之徵馮恩輩乞言為記謾序其大概付之刻石於祠泰和元年六月八日中大夫前汾州節度觀察使許安仁記并書

武略將軍汾州軍資庫使辛慶智 進義副尉趙干 進

義副尉趙万 馮定 辛恒 李琦 馮恩男信 李才

李口 王信 王豐 馮浩 馮志 趙深 馮義

李良同立石

進士楊天祐鑿博馬旭勸 汾水畢城摸勒并畫

按汾陽縣志畢宿廟在城西北三里許金泰和元年重修今廟中許節度碑具存金史許安仁傳明昌四年自禮部

郎中兼左補闕出爲澤州刺史在郡二年徙同知河南府
事升汾陽節度使致仕泰和五年卒今搨本作泰和元年
六月八日中大夫前汾州節度觀察使許安仁記并書金
史地理志汾州天會六年置汾陽軍節度使金用唐制節
度兼管內觀
察安仁結銜有前字當在致仕後通志金石記元遺山題
許汾陽詩後云許彥清示其從祖汾陽山水圖詩語意高
妙而其字畫與明昌辭人龍巖黃華黃山諸公各自名家
世尤寶惜之此爲安仁兼工書之證按安仁所撰詩文見
今碑版者有旌忠廟石刻青蓮寺詩碣合安仁撰李晏真
碑考之其涖澤州在明昌五六年其鎮汾州在承安末中
州集有許安仁詩碑見通志金石記

忠勇廟碑

碑高四尺九寸廣二尺六寸共三列上二列勅燻行書第三列記文二十二行行三十三字碑陰合衡銘十四行行三十二字俱正書今在
猗氏縣馬莊武王廟

河中府猗氏縣忠勇廟北平王馬燻

右可特封英武王

勅解州顯慶廟廣惠公口惟神克相解澤利我生民補朝廷甚大其崇命秩用顯爾靈神其終惠一方茂對休命可依前件

大觀二年十二月四日

奉

勅如右牒到奉行

大觀二年十二月五日

侍中口

太師兼門下侍郎行事

門下侍郎執中

給事中

十一月六日時事

尚書令

尚書左僕射京

尚書右僕射

尚書左丞深

尚書右丞

告英武王

馬燧奉

勅如右符到奉行

大觀二年十二月七日下

夫有唐北平郡王其雄名偉望元勲茂烈昭昭然在人耳目者有傳與碑述之已詳不待發揚而後知也初李懷光據河中奉命討之幾及請降京師言事者多請捨懷光君乃捨軍以數百騎朝於京師召見以謂懷光逆節尤甚捨之不可上許之自京師還行營不踰月而平河中朝廷褒美遷光祿大夫仍與一子五品正貲官宴賜畢復還太原及行德宗賜以御製宸宸台衡二銘請刻諸石乃於治所之起義堂西偏置之帝為題額有以見人君崇寵之禮至優至厚也又以見人臣遵奉之意至深至切也初以有功於此禮云有功於民者祀乃於行營之所起廟而血食焉至宋以勲業之隆增封為英武王一鄉之民四時奉祀縣縣而不絕也一日主廟道士

杜道樞泊鄉之好事者相与言曰王之相時行事之迹一一繪於廟壁何獨二銘今猶缺然豈前人所思之不至也予因暇日讀其傳得其銘而惜之諸公皆以為然遂命工計費刻石既成之日諸公具以此說來告且索以敘予謂天下之事有知其可為而不為卒至於弥季曠日不為而後已者皆是也有以可為而必為則雖湮沒漫滅亦能起之而不廢也予於諸公見之矣爰自創廟以來數百餘季此議復舉真有為之士也使觀其碑誦其銘者知當時君臣義重之如彼抑知諸公圖其舊而新之之意又如此將見諸公之名與此碑俱傳而不朽也固不遑歎噫噫有為之士難逢而事之顯晦亦有數也予嘉其用心且不可以不書時泰和元年七月十有

五日

承事郎前行河中府猗氏縣主簿兼管句常平倉事梁惠
裕敘

鄉貢進士陳仲謙象額

鄉貢進士薛繼先書丹

河中府天寧萬壽觀道士住持忠勇廟事杜道樞立石

同管句張琳 楊仲 張弁

宣武將軍行河中府猗氏縣尉兼管句常平倉事騎都尉
把猪□

宣武將軍行河中府猗氏縣主簿兼管句常平倉事騎都
尉烏延藥師

昭毅大將軍行河中府猗氏縣令兼管句常平倉事上輕
車都尉烏古論胡上花

碑陰

御製台衡銘

天列台星垂象于人聖人則天亦建輔臣以翼以弼為衡為
鈞如耳目應心如股肱運身是則同體孰云非親陰陽相推
四序成歲君臣相得萬邦作乂感同風雲合若符契以道匡
救盡規獻替木必從繩金其用礪帝者之盛時惟陶唐乃聞
疇咨仄陋明敷泊乎有虞二八騰芳爰迨伊尹相于成湯載
生姜牙諒彼武王道無不行謀無不臧君聖臣賢運泰時康
漢高既興蕭曹亦彰烈烈我祖膺期而昌刻滅羣兇砥平四
方維衛及英啓闢封疆曰房與杜振理維綱亦有魏徵忠譽
昂昂偉茲衆材為棟為梁蕩蕩巍巍邦家有光是知道之廢
興繫于時主主之得失資于台輔經之以文緯之以武出為

方伯入作申甫絕維載張闕袞斯補惟德是倚惟才是求人
不易知德亦難周傅說板築夷吾射鉤任之不疑千載丞休
體於至公何鄙何難追惟哲王必賴良弼矧予不德陪于理
術師旅繁起政刑多失遘茲艱屯夙夜祗慄翊我載我實維
勳賢內熙庶績外摠十連威武載揚謀猷日宣長城壓境巨
艦濟川同德同心扶危持顛予嘉爾誠爾相予理惟后失道
亦臣之恥自管格言慎終如始功藏鼎彝道冠圖史無俾伊
傅克專厥美作鑿勒銘永世是紀

按碑前刻宋牒河中府猗氏縣忠勇廟北平王馬燧可特
封英武王并列封解州廣惠公敕核諸書鹽池神進封亦
在大觀二年時祀典豐昵百神封秩視舊例進喬澤廟碑
所云可證牒末有大觀二年十二月四日奉勅如右牒到

奉行大觀二年十二月五日告英武王馬燧奉勅如右符
到奉行大觀二年十二月七日下此當時文牘體碑末有
金猗氏主簿梁德裕敘略述莊武起廟之由以主廟道士
杜道樞之請而作按馬燧征李懷光始末備詳新舊唐書
通鑑唐長孫儻漢故丞相翟公重建墓表猗氏城西五里
漢故丞相高陵侯翟公之墓貞元初懷光阻兵詔太原節
使馬燧討之燧宿兵十萬屯於城中富賊之隧并堙木刊
此莊武駐兵猗氏之證舊唐書德宗紀貞元十一年十一月辛丑太常定馬燧謚景武上改
曰莊武明何東序重修馬莊武廟記王討李懷光駐兵於猗
因廟祀焉白唐歷宋元代有修葺此莊武廟祀在宋以前
之證碑云與一子五品正員官事見翰苑集平河中大赦
制宸辰台衡一銘見舊唐書馬燧傳碑後題鄉貢進士陳

仲謙蔡額鄉貢進士薛繼先書丹猗氏縣志仲謙國子監

丞克基子幼穎悟授書卽能通大義舉賢良方正任耀州

三白渠規措使

三子膺膺庚

金史薛繼先傳字曼卿南渡後隱

居洛西山中課童子讀書事母孝與人居謙遜和雅所居

化之壬辰之亂病歿宜陽史列之隱逸以此碑考之則嘗

中鄉貢碑題諸銜有承事郎前行猗氏縣主簿梁德裕宣

武將軍行猗氏縣尉把猪

闕

宣武將軍行猗氏縣主簿烏

延藥師昭毅大將軍行猗氏縣令烏古論胡上花按德裕

胡上花皆見猗氏縣志所涖官年與碑台昭毅三品階猗

氏

下

縣從七品以三品任七品職亦罕覩者宋牒後諸銜

門下侍郎執中者何執中左僕射京者蔡京左丞深者余

深也均見宋史

段鐸墓表

碑高五尺五寸廣二尺九寸四分二十九
行行六十字正書今在稷山縣平隴村

大金故中奉大夫前克華州防禦使兼提舉學校事護軍武
威郡開國侯食邑一千戶食實封壹伯戶致仕段公墓表

公諱鐸字文仲少孤事太夫人以孝謹聞師事長兄鈞專心
嗜學行吟坐誦聲滿鄰舍方其得意則雖暴雨漂麥亦不之
覺也積數年間經籍子史無不該貫少有大志□於簡策自
書曰韓愈自比孟軻曾西不為管仲況魁天下乎苟有其志
亦無難矣所蘊槩可知已與兄鈞同遊場屋□□爭先振華
發藻難弟難兄矣都人呼為稷山二段其聲價有如此者登
正隆三年進士第五人第調長安簿未暮丁太夫人憂哀毀
踰制服除守絳州絳縣簿□戀戀松楸不能遠去也至是膺

門廕之賞不問諸子首及兄鏞是亦人之難能者秩滿除天
德軍節度判官都在北隋官置互市公監督之兩盡其平邊
人賴以安移宰耀州美原縣以仁政撫民以智術馭吏吏莫
搖手而民得歡心遺愛藹然是歲以葬事在告歸葬先郡俟
而□於叅軍之故筮會葬者不啻千人邦人榮之繼宰涇陽
陝西之民先是困於和糴公素知其利害量入為出權其輕
重抑甚贊甚賤之弊而官私俱贍瓜期將至斯民墮淚以狀
聞有司願挽留者或及萬人改克尚書兵部主事奉 命省
山西等路旱災為除租稅民之小康

世宗皇帝駕幸上京兼主六部事以

扈從之□駟應辦

住無不給以勞授同知棧州防禦使事時河決滑衛閒故相
劉瑋辟公督役工□費輕人忘其勞後被 命審決河北路

刑獄事濟以剛恕咸得平理□朝議郎中都都魏務累政不舉無補國用遴選能幹俾公服職鞭笞心計增餘數倍□

詔□□賜錢鉅万超授大名府治中兼本路兵馬副都總管時旱魃為虐飢民賒死聚嘯綠林公惻然垂憫徧加賑誘平民由是免害而盜亦□□尋授曹州刺史增邑三百戶提舉河防事方夏滯潦黃流泛溢公躬率僚屬露宿隄上風號浪激傍觀者膽悸公安然不動河神感誠徐復故道及移鎮平定是邦居壽陽井陘半山之間歲苦繁霜降早害及秋成下車以來禾稼婁豐百姓歸公和氣致然洎典吉州 詔詞謂眷彼吉鄉鄰於晉甸既往分符而守何殊衣錦之榮公領詔音蔚來拜掃五馬駢駢觀者如堵雖買臣之適吳長卿之還蜀亦未能遠過也禾古之力一至於此未幾徙節授華州

防禦使過家上冢重光里社到官歲餘喟然嘆曰吾本書生
致身至此知進而不知退古人之所深戒也自草章疏懇求
致政 朝廷勉從之 是進兩階授中奉大夫加護軍封武威
郡開國侯增邑三百戶食實封壹伯戶俸祿仍給其半泰和
元年□月□報言還故里是年十一月二十一日以微疾卒
於私弟之正寢享年七十有二父矩贈中奉大夫武威郡侯
母李氏追封武威郡太夫人兄鏞姪汝翼皆由公廕初娶張
氏再娶張氏三娶故通奉大夫馬公女竝封武威郡夫人子
五人汝楫汝霖汝明皆早世惟忠惟孝並襲父爵一守華州
鄭縣赤水鎮酒務同監一守華州蒲城縣荆姚鎮酒務同監
初蓋便於侍養也嗚呼如公之勤於學問篤於孝友官業之
克成其美進退之不失其正亦絕無而僅有也二子謹卜宅

兆以泰和二年四月二十日具禮歸葬持行狀以泣告曰知先君之詳皆莫如我公敢來請辭刻諸堅石庶足傳信於後噫孝子之心諄諄如是其可抑乎因悉言之言之不足復為之銘銘曰

堂堂段公 萬夫之特 四歲而孤 已知好德 學問

惟勤 三餘不輟 董氏之帷 孫□之雪 仁為詞章

挺特豪邁 桂林一枝 如拾地界 分苻杖鉞 出

長四州 有鄜陽春 與物咸休 立身揚名 以顯父

母 求之古人 張仲孝友 既明且哲 知止不辱

駟馬安車 歸歟鄉曲 公之名節 善始令終 □之

琬琰 穆如清風

□和二年四月二十日立石

正議大夫絳陽軍節度使兼絳州管内觀察使提舉□□
常平倉事上護軍太原郡開國侯食邑一千戶食實封壹
百戶賜紫金魚袋王□□書

資善大夫平章政事上柱國壽國公食邑三千戶食實封
叁伯戶張□□撰

棧碑稱公諱鐸字文仲少孤事母孝事兄謹與兄鈞同游
場屋有聲人稱爲二段登正隆進士第調長安簿守絳縣
簿又除天德軍判官移宰美原縣繼宰涇陽改尚書兵部
主事授同知棧州防禦使事河決滑衛劉瑋辟公督役被
命審決河北刑獄事授大名府治中又爲曹州刺史提舉
河防移鎮平定典吉州未幾授華州防禦使疏請致仕進
授中奉大夫加護軍封武威郡侯增邑三百戶食實封一

百戶給半俸泰和元年還里是年十一月卒年七十二父

矩贈中奉大夫武威郡侯

矩自有碑李愈作表元文類稷山縣志均同

母李氏

追封武威郡太夫人初再娶皆張氏三馬氏並封武威郡

夫人子五人汝楫汝霖汝明早卒惟忠惟孝襲父爵一守

華州鄭縣酒務一守華州蒲城縣酒務泰和二年葬公如

禮持狀請銘據碑所言與通志金石記稷山縣志互證大

致相同攷寰宇訪碑錄亦載此碑注張萬公撰正書泰和

二年四月山西稷山是撰碑者爲張萬公金史張萬公傳

字良輔東阿人正隆二年登進士第大定四年爲東京辰

涑鹽副使擢河北西路轉運司都句判官陞司直四遷侍

御史遷刑部侍郎章宗卽位遷御史中丞明昌二年知大

興府事拜參知政事移鎮濟南以母憂去職詔起復拜平

章政事躋遷資善大夫封壽國公銜與碑題合蓋此碑之作在萬公母憂復職之後故題是銜又劉瑋傳明年擢戶部尚書時河決於衛自衛抵清滄皆被其害詔兼工部尚書往塞之瑋辟公督役當以是時又梁襄傳太常卿張瑋曹州刺史段鐸薦襄學問賅博可任禮官是鐸任曹州刺史之證而鐸無專傳故不及悉證其前後所爲之官以元文類彙集段氏阡表攷之武威郡侯諱矩生三子長曰鈞次曰鏞又次曰鐸鐸以正隆二年進士官至華州防禦使武威所因以得封者也鏞先卒而二人以文行稱謂之河東二段在防禦時隴西侯李愈作武威墓表前矩自有碑者卽謂是又按矩父季良愈亦爲作墓表當亦在防禦時事是矩與季良之封均因鐸而受後其支系亦甚知名則

段爲稷山望族洵無疑矣碑文漫漶處甚多後題書撰人亦闕若非訪碑錄載此實有不辨其爲誰何者碑後題銜可辨者止有正議大夫絳陽軍節度使兼絳州管内觀察使提舉 關 常平倉事太原郡開國侯食邑一千戶食實封一百戶賜紫金魚袋王 關 資善大夫平章政事壽國公食邑三千戶食實封三百戶張 關 今以訪碑錄證之可補爲萬公撰而書碑之人則仍闕略爲恨豈非風雨摧殘難以傳信與碑立於泰和二年四月二十日碑見通志金石記

稷山段氏世表

段氏所表	應規 <small>宋司理參</small>	季先 <small>應規四世</small>	矩 <small>字子法</small>	鈞 <small>矩子字</small>	汝礪 <small>鈞子</small>	廔 <small>鈞子</small>	克己 <small>恒子</small>	思永 <small>克己子</small>	似
單 稷山孫	大夫護軍 武威郡侯	和仲	矩子字	和仲	汝舟 <small>鈞子</small>	恒 <small>汝舟子</small>	成己 <small>恒子</small>	思誠 <small>克己子</small>	英

季亨

李愈撰

屋縣商酒
都監

汝翼 鐸子

季良

字公善

徹

鐸 矩子
文仲正

汝梅

李愈撰墓表

季亨子
知太平

陸進士華
州防禦使

汝楫 鐸子

季昌

縣

武成開國
侯張萬

汝霖 鐸子

季連

衡

公撰墓表

汝明 鐸子

惟忠 鐸子
守華

術

州鄭縣赤
水鎮酒務

同監

惟孝 鐸子
守華

州蒲城縣

荆姚鎮酒

進士圭宜
賜諡
修己 恒子

中府儒學
教授
思溫 克己子

甫 彥

思義 成己子
平

孚

陽路儒學
教授

輔 思溫子
吏部侍

郎

彝

經

循

順

段季良墓表

石高五尺三寸八分廣二尺八寸一分二
十二行行四十五字正書今在稷山縣

大金故武威段公墓表

段氏之興其來遠矣世居武威在漢則北地都尉印在魏則
晉興太守紛至於有唐尤為顯煥身居將相公望崑崙則文
昌其人也笏擊姦邪英烈言言則秀實其人也其餘特書史
籍乃寘周行者亦不可縷數降及前宋則我司理叅軍出焉
叅軍諱應規鄉於絳之稷山門族蕃大連薨接開相望屹然
邑人号司理莊以別之尔後埋光種德疆畝相承不替其緒
者累葉矣四世孫季良字公善乃故贈中奉大夫武威郡侯
矩之父也故華州防禦使鐸之祖也昆季五人兄曰季先季

亨弟曰季昌季連姪五人徹整衡術析量材授事各有所主
或私門幹蠱或贊宇治經俾皆不失其性分公生而敦敏不
喜兒嬉長而厚重不悅紛華壯而負長材遠度耻為齷齪近
步以遵常守故而己人有勸其仕進者笑而不荅私謂所親
曰丈夫居世豈能以太倉一粒爲人所役哉姑山之陽汾水
之曲世有善田數頃許足以馨祭祀奉甘旨備歲時伏臘之
禮給子孫詩書之費孝乎惟孝友於兄弟善於鄉里是亦為
政奚其為為政哉勸者知退事兄季亨尤為盡禮季亨之子
整與賓賈之書升於太學絳之距汴不啻千里始我往矣琴
書僕馬無不畢備及至之日津遣以時俾忘倦游整亦不負
叔父之志曉牕夜燭克終其業為時聞人娶故洗馬楊君孫
女天資仁俶司我中餽其姪整後以文藝擢知大平縣事人

皆歸美賢叔之致居無何昆季中有求分異者公拒而不諾者再三至不得已泣而告曰一斗粟尚可舂一尺布尚可縫同枝連氣何遽如是中外資產任君等所取一無所爭吾主張門闕培樹德善積有年矣天寔知之其肖負我嗚呼公之言莫仁人之言哉如其敦好本業不務外飾輕財重義樂善好施求之古人中十無二三享年六十有五實天眷元年七月十七日也松區已剪矣壤廈已安矣孝孫之心猶以為不足遠採它山之石樹立豐碑圖不朽計愈晚生詢之蒼蘓叅以耳目之所接猶得詳言之而為之銘 銘曰

姬姓分封 鄭武公子 段氏之興 自茲伊始 枝葉

相承 多歷年所 乃武乃文 或出或處 厥惟我公

稷山巨族 樂守農田 耻修邊幅 孝弟睦姻 得

之自然 朋友稱言 族黨稱賢 昆季之間 有求異
爨 推肥取瘠 曾無競畔 哀此哲人 生而有死
天鑒孔明 子孫受祉

泰和二年四月二十日立石

平倉事飛騎尉□□開國男食邑三百戶賜紫金魚袋
裴國器書丹并篆額

上護軍隴西郡開國侯食邑一千戶食寶封壹伯戶賜紫
金魚袋李愈撰

碑首敘段氏世次及官闕次及家業始終皆段氏一門
之事無他及者蓋公以不仕稱故無匡時濟世之略非闕
如也碑稱公諱季良字公善爲宋司理參軍應規四世孫
故武威郡侯矩之父故華州防禦使鐸之祖昆季五人曰

季先季亨季昌季連並公而爲五姪五人曰徹整衡術衍
公幼不務嬉游長不悅華靡有勸之仕者笑而不答自應
規以稷山著世咸家焉娶故洗馬楊君孫女亦能以仁淑
相輔後昆季有興析產議者公拒之不納真古人也公年
六十五以天眷元年七月十七日卒李愈爲之銘按元文
類彙集段氏阡表應規至段輔凡十一世今以文攷之由
輔而上及於矩凡七世由矩之父季良而上及於應規又
凡四世此碑題四世恰與其數合又攷稷山縣志應規孫
季良墓按應作四世孫直謂之孫或係省文李愈表在平
隴村卽指此碑而言又金史李愈傳愈字景韓正平人中
正隆五年詞賦進士第累遷解州刺史擢河南路提刑使
徙順義軍節度使承安二年爲刑部尚書泰和二年授河

平軍節度使改知河中府致仕碑此時立應題前官而止及勳封疑上文有闕觀題銜可見碑末銜題平倉事飛騎尉開國男食邑三百戶賜紫金魚袋裴國器書丹并篆額上護軍隴西郡開國侯食邑一千戶食實封一百戶賜紫金魚袋李愈撰校此均係勳封非實官也平倉事當爲提舉常平倉事開國男上亦有闕文校國器及碑文所稱姪整擢知太平縣事均可爲攷古者之助

段矩碑

碑高五尺四寸五分廣二尺七寸二十四行行四十九字正書今在稷山縣

大金故贈中奉大夫護軍武威郡侯段公碑

夫有陰施者必有陽報有隱行者必有顯名近則吾身親見之遠則來裔有興者如影逐表若響應聲靡毫釐之差此古

今之常論而人情之所同然也嘗於故贈中奉大夫武威郡侯段公得之矣公諱矩字子法稷山之巨室也少穎悟異於常兒甫七歲入小學端慤莊重已如成人既冠則不喜章句蓋天資簡淡於世事無一可閔心者嘗語人曰用天之道分地之利謹身節用以養父母幼受師禮之訓有得於吾心者止此耳故謹守家政敦好本業以田園自憙卜築於姑汾兩間日課奴隸灌蔬畦藥培菊植松屏絕車馬之喧而受用林泉之樂好古博物所與游從者一無俗客非遠法師之束結蓮社即桑苧翁之叅議茶經也議者謂不沽隱居之名而得隱居之實雖在閭室無毫髮之欺見善如不及輕財如糞土計終歲之所得除仰事俯畜賓客祭祀之外一無所積悉以分人尤喜賑人之急至推食以飫飢者解衣以煖寒者嘗遇

饑歲邑人艱食罄竭家資力圖援救賴以全活者甚衆識者謂天道好還段氏其將興乎可立而待其子鐸果擢高科登顯仕公以子貴特贈儒林郎尋遷至中奉大夫加護軍而守侯封噫天之報施其如何哉故曰有陰施者必有陽報為不誣矣享年三十有七卒於天會十一年六月十八日嗚呼設施注措如彼而壽考如此其天欲侈其後而嗇其筭者邪陰理又有不可測者此聖人之所難言也取故吉州市曹李君女追封武威郡太夫人夫人賦性柔善承我先祖奉我祭祀罔不克敬采蘋采芣皆無失職年未四十薨居潔志恒若致齋督諸子以學問事姑楊氏為至孝饕服湯藥寒煖燥濕惟性之適接遇族人曲盡恩禮下至傭丐媵妾亦深存卹疾言厲聲不聞於外而閨門肅然平生無他嗜好獨喜佛奉之尤

謹晨香夜燈孜孜禮念雖甚寒劇暑不廢也後子孫超顯鄉
評亦歸夫人好德之致三子長曰鈞字平仲有聲場屋中年
告終次曰鏞字和仲以弟廕諾仕終於鳳翔府盩厔縣商酒
都監季曰鐸官至中奉大夫華州防禦使一女適故南征千
戶忠翊陳氏之子濤渠亦豪於文筆不幸蚤世孫九人汝礪
汝楫汝舟汝梅汝霖汝明汝翼惟忠惟孝汝舟以叔廕當補
因讓季弟汝翼士論臆之惟忠惟孝並襲父爵各守職任重
孫五人曰履曰恒尤為翹楚者皆業詞賦屢達 廷試他日
亦未易量故陵在平隴之原安厝久矣其孫復具三品儀物
而表飾之愈以同里巷知其行事為益詳乃再拜叙其本末
而□□銘曰

十年種木 培植弥深 枝葉必茂 蔽芾其陰 百年

種德 積累弥厚 子孫必興 蕃□□後 猗歟段侯
隱居求志 謹守疆畝 岡于市利 輕財重義 解
人之危 貽厥孫謀 增築鐵基 天報靡虛 匪榮一
躬 果及其子 皆即侯封 平隴之原 青松伊鬱
銘石□崑 過者必式

泰和二年四月二十日立石

奉訓大夫□□留守判官兼提舉學校常平倉事飛騎尉
開國男食邑三百戶賜紫金魚袋裴國器書丹并繁額
通奉大夫知河中府事兼提舉河防學校常平倉事□護
軍隴西郡開國侯食邑一千戶食實封壹伯戶賜紫金魚
袋李愈撰

校碑言公諱矩字子法少穎悟異於常見既冠不喜章句

敦好本業以田園自慕嘗遇饑歲邑人艱食罄家資力圖
補救賴以全活云云元文類虞集稷山段氏阡表泰定四
年秋天官侍郎段輔出其先世遺文告集曰維段氏世居
絳之稷山由輔而上邈其可知者爲前宋司理參軍諱應
規五世孫爲金武威郡侯矩生三子曰鈞鏞鐸皆與此碑
合碑言鈞字平仲有聲場屋中年告終次曰鏞以弟庶終
盤屋縣商酒都監季曰鐸官至中奉大夫華州防禦使虞
集阡表云正隆進士官華州防禦使武威所因以得封者
校武威卽謂矩碑云女適故南征千戶忠翊陳氏之子濤
渠忠琳孫九人汝礪汝楫汝舟汝梅汝霖汝明汝翼惟忠
惟孝並襲父爵重孫五人曰屢曰恒卽汝舟子屢達廷試末題
泰和三年四月二十日立石奉訓大夫闕留守判官兼提

舉學校常平倉事飛騎尉開國男裴國器書丹并篆額通
奉大夫知河中府兼提舉河防學校常平倉事闕護軍隴
西郡開國侯李愈撰金史傳泰和二年授河平軍節度使
改知河中府事致仕泰和六年卒不言何年知河中以此
碑考之則以泰和三年仕檢愈爲此碑見段氏阡表云在防禦
時隴西李愈作 矩子鐸亦自有碑
武威墓表是

萬泉縣宣聖廟記

碑高四尺二寸七分廣一尺八寸二寸
七行行六十四字正書今在萬泉縣

河中府萬泉縣重修宣聖廟記

徵事郎前臨洮府當川縣令武騎尉賜緋魚袋張邦彥撰
登仕郎河中府臨晉縣丞牛顯祖書并題額

晉穆叔與范宣子論及立德立功立言之事後人為□□之

說者曰太上立德意謂口帝曹舜是也其次立功則禹稷是也其次立言則周任史佚臧文仲之屬是也古之所謂死而不朽者蓋其大指之如此夫人得其一則猶且映照萬古而稱誦不忘口吾夫子於此數事直能兼之者耶夫上律天時下襲水土使萬物並育而不害然後小德川流大德敦化淵淵其淵浩浩其天若夫子者可謂能立德矣周道陵口綱紀口諸侯不度僭亂者多楚子問鼎之輕重晉侯請隧而驕矜吾夫子憤其如此則作為春秋以正名分使君臣父子各得其宜姦諛斃矣重戮於九泉之下潛德蝕矣光華於万代之表袞冕在身不足喻其褒樞榘於市不足方其貶故亂臣賊子惕息畏懼實吾夫子之力也昔楊墨塞路孟軻辭而闕之昌黎猶曰其功不在禹下况吾夫子者耶其若是者可謂

能立功矣。演十翼而讚爻象，正五始而修春秋序書，則斷自唐虞。刪詩則取合禮義，制禮作樂，經緯人道，身雖不用於一時，典則傳之於萬世。若夫子者可謂能立言矣。故天下郡縣春秋二祀，與社稷相配而禮又過之。自孔子沒迄今幾二千歲矣。然其子孫封爵相襲，亶亶不絕。雖周秦漢魏之君，繼亶皆有天。下及乎時代革，易世數綿遠，其子孫承襲者尚□以云而吾夫子獨以布衣之屬傳世久遠，與天地相為終始，非大聖人者其能若是乎。

本朝自有天下，幾及百年。京府州縣皆有學校，彬彬之教可謂布行邦域之內矣。而襲衍聖之封者，如有朝祭，其爵必預四品之列，則聖人之休烈可謂光于前亶矣。通者河中萬泉簿劉君從謙，字光甫，亶為解之安邑人，以明經擢進士第，為

中甲魁四方士子多往從之自泰和元年冬十一月下車其為政也寬不太柔猛不太虐舉廢有法條教可觀曾未踰時而闔境之民皆畏愛矣翌日躬詣學校視其棟宇傾欹墮垣圯毀及睹前宰公趙瞻與攝縣令鄭滋碑刻所載修學之事至甚明白然兵火之餘蹤跡蕩盡近縣令丁公侃亦嘗修之又且制度隘陋不與縣郭相稱公用慨然欲加崇飾乃暨邑中進士張琚丁勗及居民謝天祐等相與謀曰學校者化民之本仁義道德之所興修也禮樂教化之所宣布也人材之所作成也風俗之所變易也廣而言之則致君澤民之道皆出其中其為功也不止於肄業之人鈞巍科取青紫而已吾欲增崇頗使壯麗公等若之何皆曰先生一登臚仕大邑斯臨夫承流宣化乃其職也果欲為意豈惟琚等為幸甚多一

邑之民皆受賜矣乃以泰和三年夏四月揆日營建公則罄其俸給所餘不問家之有無一皆出之以佐經費於是邑中之民富者助財貧者助力如棟宇楹杙之資墜塗楛堊之用則富民大家之所樂輸也如持畚荷鍤之勞租衣服役之事則閭巷少年之所願為也公雖旦夕往詣其中特為經畫加指示尔曷嘗以力而強之耶易曰說以先民民忘其勞其是之謂乎凡為口八十間正殿在前講堂在後堂之左右翼以兩齋士子之進修者此為游處又為兩廡直接賢堂祭器不可以徒列也為房庫以存貯之膳食不可以無所也為厨室以飪饌之賢堂二所分設於正殿之前又於其南起四賢堂皆所以褒大先儒也正殿基構煥然一新門樓碑樓悉補其弊餘則劉侯創之耳螻蟻鳴而工始興玄鳥歸而能事畢且

使觀旂采藻之人削槩懷鉉之士望其殿宇崢嶸制度雄壯
莫不巍巍峩峩聳其瞻視者矣嗚呼劉君起身白屋試手治
民官職猶未甚尊俸祿猶未甚厚乃能捐罄囊橐毅然惟以
修學為事者蓋以奉宣教化主張吾道之為任也噫其亦難
乎哉使一州一縣官長僚屬皆若劉君之用心則四海之內
猶弗治者未之有也落成之日邑人皆欲刻石頌德以傳不
朽乃託僕之鄉人聞喜簿孔祖湯者特來謁文且曰鄴侯李
繁建學於處州而昌黎韓愈為之文秦尉表弁修學於扶風
而駕部郎中程浩為之記今夫劉君功業不減向之表李而
未有韓愈程浩為之發揚先生於此獨無意哉僕曰素無學
問訥鈍於辭加之平生黃卷久不用心尚欲鋪張鴻藻而發
揚劉君乎但為抽毫記實以需史氏之採擇可也孔曰斯足

矣。○援春秋有年之例。○喜為之書謹記。

泰和三年十二月上旬日

進士張琚等立石

吳光遠刊

按碑題徵事郎前臨洮府富川縣令武騎尉賜緋魚袋張
邦彥撰登仕郎臨晉縣丞牛顯祖書。按泰和四年聞喜縣
修宣聖碑記亦邦彥撰題銜與此同。邦彥又見安邑縣志
碑言河中萬泉簿劉君從謙字光甫世為解之安邑人以
明經擢第泰和元年十一月下車為政。此金泰和元年是
月從謙為安邑主簿之證。碑云前宰趙瞻與縣令鄭滋碑
刻所載修學事甚明。宋史趙瞻傳字大觀舉進士第。調孟
州司戶參軍移萬泉。捐圭田修學宮。士自遠而至。改知夏

縣作八監堂書古賢令長治迹以自監按史於瞻泚萬泉
嘗修學宮與此碑合鄭滋修學事不見志可據碑補碑有
縣令丁侃縣志明昌二年任碑以從謙傾俸修廟而立有
進士張琚可爲考晉文獻者之助韓昌黎文見本集程浩
文見唐文粹碑有襲衍聖之封者云王圻續文獻通考金
天眷三年詔求孔子後加四十九代孫承奉即襲封衍聖
公奉祀事亦見續通鑑諸書可參碑見通志金石記